

النص المسرحى

فى انتظار راضى

Waiting for radii

مونودراما قصيرة رجال

2023

باللهجة العامية المصرية

تأليف

بسام حسن

طبعة اولى اكترونية

جميع الحقوق محفوظة للمؤلف

الشخصيات :

صابر (رجل في الخامسة و الأربعين من العمر)

*الزمان : * العصر الحالي

المكان :

غرفة نوم متوسطة المستوي بدولاب وسرير و تسريحة وتلفزيون
صغير و تراييزة خشبية وثلاجة متوسطة

تفتح الستارة .. موسيقي صاحبة تملأ المكان يدخل صابر رجل في الاربعين من عمره .. منكوش الشعر .. وله لحيه .. يرتدي الملابس المنزلية .. يمشي متثاقلا .. ثم يقف جامدا صامتا .. امام مجموعة من شهادات وصور ومراة معلقة علي الجدران في الغرفة .

صابر : انا .. انا صابر .. انا زهقان .. قرغان .. مدايق (ينظر إلى المرآة) النهاردة عيد ميلادي .. عمري خامسة وأربعين سنة .. عدي من عمري كل السنين ديه كلها.

(ينظر إلي ساعته) الساعة قاربت علي ١٢ ليكون بداية يوم جديد ليا في حياتي .. حصلت بصاحب العمر من ايام زمان .. نسهر سوا .. علشان منفعش أحتفل مع نفسي في يوم زي ده لوحدي . (يخرج هاتفها محمولا من جيبه)

.. طيب ما انا طول عمري عايش لوحدي لا زوجة ولا اولاد . (في حزن ..)

هي ناقصة وجع دماغ وشيل هم .. والواحد يعجز قبل الأوان .. وانت نازل يا حبيبي خد معاك كيس الزبالة (يضحك) .. وانت راجع اوعي تنسي العيش الفينو و اللبن الزبادي .. هات بامبرز .. (بيرود) حاضر .. حاضر .

(صمت قصير جدا)

صابر : (بحزن) علشان كنت المفروض اكون عايش سلطان زماني .. نسيت هو انا متجوزتش وفتحت بيت لغايه دلوقتي علشان ايه .. مش فاكر (يحاول يتذكر) منه لله الزهايمر ... افكرت كنت طوال السنين ديه كلها بدور علي شغل .. علشان أكون نفسي واجيب شقة أوضتين وصاله أو اوضه وصاله أو اوضه من غير صاله (يمسك المحمول ويطلب الرقم ويضع الهاتف علي أذنه وينتظر) مشغول .. مشغول

.. افكرت انا اشتغلت في أشغال في كل حته قد عدد شعر راسي (ينظر إلى المرأة مرة أخرى) هو فين الشعر اللي في رأسي.. أنا بقيت اصلع... بيقولوا ان الصلع دول أنكياء (بضحك) مجرد كلام ناس .. وكمان الشعر الابيض بدأ ينبت في راس و دقن الواحد .. لبت الشباب يعود يوما .. اة يا زمن ملكش كبير (ضحكات هسترية)

(صمت قصير جدا)

صابر : (يراجع نفسه في الاتصال) نكمل وبالنسبة لموضوع الشغل علشان الجواز والعيال..كنت بطلع من الشغل علي الفاضي.. اشتغلت زي ما اشتغلتش..ومعملتش أي فلوس أعرف أتجوز بيها.. مش عارف ازاي يعني.. العيب فيا ولا العيب في صحاب الشغل(ضاحكا) .. خلصت الدراسة في الجامعه ٢٣سنة وبعدين دخلت الجيش (ينظر إلى شهادة الجيش المعلقة علي الجدران) طبعاً خدمة للبلد .. ده واجب وطني .. وطلعت من الجيش قدوة حسنه.. وقولت انزل اشوف اشتغل بشهادتي (ينظر إلى الشهادة الجامعية المعلقة علي الجدران) و عرفت ان البلد مش بلد شهادات .. بلد حاجات تانيه مكنتش عارفها.. زي معاك واسطه.. تعرف عضو مجلس شعب او سكرتير في مجلس محلي .. معاك فلوس تدفعها.. يعني شاي بالياسمين .. علشان تشتغل في اي مصلحة او شركة(في ملل وقرف) .. عايز شركة بترول ولا كهربيا ولا غاز ..رشا بتسلم عليك يا حج. (يضحك) طيب خليها شغلانة فرد امن في فندق ثلاث نجوم .. (يرجع ينظر للشهادة) طيب اعمل ايه.. مشروع صغير زي مثلا افتح كشك سجائر او اكون بتاع كلور وصابون سايل .. او اسوق موتوسيكل او اشتغل ديليفري في مطعم او صيدلايه .. او اشتري عربية حديثة اشتغل عليها اوبرا او كريم .. (في يأس) معيش ومعرفش..

* **يقلد صوت صديقه** _ : * (بنبرة متعالية) طيب سافر بره البلاد شوف
حظك في اى أرض تانيه وللسفر سبع فوايد.. اطلع أوروبا او دول
الخليج ..اعمل قرشين .. القرش الأبيض ينفع في اليوم الأسود .
صابر : ماشي اسافر إزاي من غير جواز سفر أو عقد عمل أو
تأشيرة..

إيه حسافر علي ديل الطياره مثلا (يضحك بهسترية).

(صمت قصير جدا)

صابر : (يوجه كلامه للجمهور) حضرتكم انا بدور علي شغل عندي
٤٥ سنه ومتخرج من السياحه والفنادق و ورقى جاهز ومستعد لاي
شغل المهم اشتغل لو من دلوقتي

سوبر ماركت

فندق .. مساعد شيف

محل منظفات

مطاعم فرايد تشيكن

مكتبه

استوديو تصوير

مراقب كاميرات

اي شغل من فضلكم وجزاكم الله كل خير .

(صمت قصير جدا)

(اظلام)

(إنارة)

صابر: (يظهر لنا صابر وهو جالس وممسك بيديه الجورنال ويقرأ بصوت مسموع وهو يقلب صفحات الجورنال) ارتفاع أسعار البترول.. تعويم الجنية .. ارتفاع سعر الذهب ..ارتفاع السلع الغذائية.. الحرب العالمية الثالثة (يرمي الجورنال دون أن يكمل قراءة الأخبار وقد اصابه الذهول و القرف) .. انا عراقي المولد مصري الجنسية .. اتولدت في مدينة بغداد العاصمة من اب مصري وام مصرية .. ابويا زي كل المصريين في الثمانينات سافروا العراق وليبيا والأردن علشان لقمة العيش.. اشتغل في شركة أجنبية في تعمير العراق .. ولكن الظروف تتغير وتتلون وتبدء الحرب الإيرانية العراقية علشان ابويا ينزل اجازة بلا عودة ويحصل اغتيال للرئيس السادات علي المنصه في اواخر السبعينات في العرض العسكري علي يد الإسلام السياسي .. والدنيا تمشي في الثمانينات والحال يتعدل شوية.. وبعد سنين تعدي مش كثير تدخل العراق جارتها الكويت و تولع الحرب وينزل باقي المصريين هارين من الحرب وسابوا هناك شغلهم وقلوسهم وبيوتهم اللي ضاعت في الحرب ويدفع أهالينا الغلابه تمن الحرب..

(صمت قصير جدا)

صابر : (يشعل سيجارة) وتدخل ماما امريكا أرض العراق العربية مع بتوع التحالف الدولي وقبلها ضرب مركز التجارة العالمي بامريكا من شله بن لادن .. (بصوت مهزوز) و بعدين شويه نشوف في يوم العيد الكبير يعدم الرئيس العراقي علي كل شاشات تلفزيونات العالم واحنا قاعدين في البيوت بنديج خروف العيد .. وفي الجوامع بنصلي كلنا مع بعض , .. وضاعت مدينة بغداد زي ما ضعت مننا أرض فلسطين .. انتقل لسه اللي جاى احلى .

(يتنهد و يضرب كفا بكف) وتاخذ ماما امريكا بترول الخليج ببلاش من غير تعب او مجهود .. وتعمل قواعد عسكرية علي الأراضي العربية بحجة حماية العرب من نفسهم .. احتلال لابس قناع (يظفي

السيجارة) وتنقسم العيله العربية الواحده (يفتح الراديو يسمع الى
اغانى وطنية)

أوبريت الضمير العربي : ماتت قلوب الناس ماتت بنا النخوة.. يمكن
نسينا فى يوم ان العرب اخوة.. (يغلق الراديو)
(صمت قصير جدا)

صابر : (بلفظ مرتجف) كنت خلصت الجامعة الدور علي شغل ..
انا تقريبا وزعت ال CV بتاعي علي البلد كلها ومفيش حد قالي انت فين
؟

* _يقلد صوت صديقه_ : * (بقوة) تعالي نشتغل في السياحة
في شرم الشيخ او الغردقة ونتجوز روسية او بولندية وتكون موزه
وتفيل مصنع بلدها و نساfer معها بره البلد ونشوف أوروبا ونركب
القطر الدولي وندخل بلد تانيه أوربية احسن.. وتلعب البليه معنا..
ونعدي من الفقر (يقف ويخرج حقيبة سفر ويعد ملابسه في الدولاب
(

صابر : بس بتوع الجماعات الإرهابيين ولاد التيت.. راحوا قبل مننا
هناك وانتفجرت الفنادق في شرم الشيخ بلا رحمه ومات عشرات
العماله اللي شغاله بلا ذنب و اتسرح باقي الآلاف من العماله بلا
شفقه وكان قبلها بشويه ضرب معبد الأقصر ومات سياح أجنب (يراجع
بعضية زائدة عن الحد) بسبب ارهاب بلا دين ولا وطن له .
نفسه في اعداد ملابسه)

(صمت قصير جدا)

صابر : (يخرج الهاتف) أحاول مرة ثانية (يطلب الرقم ويسمع)
مشغول ... مشغول (يغلق الهاتف) روحت اشتغلت في شركة
باليومية مع مقال من الباطن .. (بعضية) وصحيت فجأة علي
خصصه شركات القطاع العام .. وكان لي زميل متتبت في الشركة..

اخذ الفلوس اللي صرفها من الخصصه وكان عامل فيها عم بلبيل
فرحان وصرفهم كلهم علشان اشترى شقة جديدة بدل اللي وقعت علي
دماغه في زلزال ٩٢ و قعد في مسكن بديل في مساكن الإيواء وفي
تغيير العفش للبيت الجديد وجاب غسالة و بوتجاز خمسه شعله
وثلاجة (يتجة للثلاجة .. يفتح الثلاجة) الثلاجة فاضيه .. الاكل
الى فيها بايت .. الجو حر .. انا عطشان

(يخرج زجاجة ميه) طعم الميه الساقعه حلو .. بشرب من نيلها
علشان اغنيلها (يغلق الثلاجة)

صابر : وجاب الرسيفر والطبق بالمره علشان الدوري الأوربي ..
والفلوس طارت في الهوا .. (في يأس) وقعدنا ع القهوة انا و هو
نتفرج علي صفر المونديال ونحلم مع بعض بالوصول لكأس العالم
(يصفق بأستهزاء)

(صمت قصير جدا)

(يلتفت للتلفزيون ويرفع الصوت) : خبر عاجل .. وقد توفي
البوعزيزى فى مستشفى بن عروس بسبب حروقه البالغة الذى قام
بأضرام النار فى جسده تعبيراً عن غضبه على بطالته ومصادرة العربة
التي يبيع عليها من قبل الشرطة فادية حمدي وادى ذلك الى اندلاع
شرارة المظاهرات فى تونس الراضين لما اعتبروه اوضاع البطالة وعدم
وجود العدالة الاجتماعية وتفاقم الفساد،(يغلق التلفزيون)

صابر : (في ثورة) ونزلت الميدان مع الأهل والصحاب ضد
التوريث في ٢٥ يناير و قولنا عيش حرية عدالة اجتماعية.. علشان
يكون بكرة أحسن من أمبارح ..

*يقلد صوت صديقه: * أنت نازل ليه الميدان ؟

صابر : علشان التغيير للافضل

يقلد صوت صديقه : شالوا الدو جابو شاهين .. كده كده مش
لاعين

صابر: (في إصرار) كلام مش معقول ومش حيكون

يقلد صوت صديقه : احمد زي حاج احمد

صابر : محصلش .. بس ناس تانيه ركبت علي الموجه ديه.. ركبت
علي أحلام وثورة ودماء وتضحية الشباب العربى .وغرقت مصر
وتونس وليبيا و لبنان وسوريا والسودان واليمن .. وقبلهم العراق
وفلسطين وسط الامواج موجه توديهم لبعيد وموجه تانية تجبهم لبر
الامان .

(يفتح النافذة و ينستشق الهواء)

صابر : الناس ماشية في الشارع متتحة والههم مسيطر عليها.. الدنيا
زحمه .. الشوارع متكسره .. مفيش نسمة هوا .. راضى لسه مجاش .
(يدير ظهره للنافذة والشارع .. داخل منزله) بس اكيد راضى جاى .

(صمت قصير جدا)

(اظلام)

(إنارة)

صابر : (يعطس) انا تعبان شويه كثير .. حرن تاني علي صحي
(يطلب الرقم ثانية).. مش قادر ..جسمي مرهق من الألم والوجع (ينظر
الى يديه) وعندي صداع واحتقان و حاسه الشم والتذوق اختفت..
درجة حرارتي ٣٨ (يمسح عرقه) وحاسس ان جسمي ضعيف جدا
ونفسي مسدودة (يخطو نحو الامام ثم يستدير بغضب ثم بعد ذلك
يتوقف) مش قادر اكل.. مش قادر اتنفس. كويس . ده الموت بعينه..
ألم ببرد بتعب في الصدر .. بعدم راحه

(يضع يديه على بطنه ويبدأ يتنفس بشكل عميق وببطء) .. كرشه
نفس .. (برعب) حاسس بوحده قاتله وأوقات طويلة واتخنقت من
نفسي.. مش عارف ادخل الحمام مش عارف انام.. مش عارف أف..
(مذعور) مش عارف ديه اعراض برد عادي ولا أعراض أنفلونزا
الطيور و لا أعراض أنفلونزا الخنازير و لا اعراض لكورونا .. اقامة
جبريه.. البيت ممل بيت مهجور .. (اطفاء تدريجي عدا بقعه ضوء
علي صابر) الانسان كلمة.. نفس داخل ونفس خارج .. (بهدوء)
الإنسان بيحي ويموت في نفس الوقت .. ولكن المرض بيوقف عقارب
ساعه الزمن .. (في تسامح) راضى .. صحبي عشره العمر مش
بيرد ..باين عليه مش جاي النهاردة (يلقي الهاتف علي الارض)
انا صابر بس مكنتش ابدأ راضي (بصوت عال)..

انا اموت.. اموت يوم عيد ميلادي (يسقط علي الأرض مع موسيقي
نقد مات صابر)

(بلاك)

إنتهت

(النص متاح للتحميل والقراءة مجاناً ولايجوز العرض او النشر او الاقتباس إلا بموافقة كتابية من
المؤلف او إتفاق مسبق ..)

مصر - الإسكندرية ٢٠٢٣

للتواصل :-

□/bassam19111980@gmail. Com

□/٠١٢٠٨٤٥٩٠٠٩